



Noé ayant planté la vigne beut du jus d'icelle, & dormant est mocqué par Cham son fils.

LES fils de Noé qui furent préseruez en l'Arche de la fureur du Deluge d'eau, furent Sem, Cham, & Iaphet. Et Cham fut pere de Chanaan, de la race desquels fut par apres repeulée la terre. Et Noé ja ancien commença à cultiuer la terre, & y planta la vigne qui produisit du raisin que Noé pressa, & beut du jus d'iceluy, qui le troubla, & s'endormit au milieu de son paillon. Ce fut lors que Cham vid les parties honteuses de son pere, & s'en moquant l'annonça à ses freres. Adonc Sem & Iaphet honteux détournèrent leur face en arriere, & recourirent la vergogne de leur pere; lequel estant éveillé, & ayant sceu ce que son fils Cham auoit fait, en fut fort troublé: Toutesfois ayant égard à son sang, ne le voulut maudire; Mais il dit, Maudit soit Chanaan fils de Cham, disant; Tu seras seruiteur des seruiteurs de tes freres. Puis Noé donna sa benediction à Sem & à Iaphet. Or ce bon pere ayant vescu apres le Deluge trois cens cinquante ans, mourut. Ses ans furent, tant deuant qu'apres le Deluge, neuf cens cinquante ans. Ses enfans multiplierent sur la terre en telle fecondité, que plusieurs generacions sont sorties d'eux; desquelles plusieurs Villes, à sçauoir Ninie, Salem, Sodome, Gomorre, & autres habitations eurent leurs commencemens, qui ont esté de grande renommée entre les peuples.